

**Meeqqat atuarfianni fagini tamani akunnernut ilinniartitsiviusussanut minnerpaaffiliinissaq anguniarlugu inatsimmut atuuttumut allannguutissatut siunnersuummik saqqummiussinissamut Naalakkersuisut peqquneqarnissaannut inatsisartut aalajangiiffigisassaattut siunnersuut. Inatsisip allanngortinneqarneranittaaq akullerni atuartuniit tulluttut danskisullu akunnerit ilinniartitsiviusut amerlaqatigiilernissaat qulakkeerneqassaaq. Allanguut aggustimi 2020-mi atuutilissaaq.**

(Inatsisartuni ilaasortaq Mimi Karlsen, Inuit Ataqatigiit)

### **Akissuteqaat**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

### **Siullermeerneqarnera**

Naalakkersuisut siunnersuuteqartoq Mimi Karlsen, Inuit Ataqatigiit qutsavigaat siunnersuuteqarmat meeqqat atuarfianni atuartitsissutit ataasiakkaat akunnernik minnerpaaffilerneqassasut uani qitiutinneqarluni tuluttut danskisullu atuartitsinermit akunnerit atuartitsiviusussat amerlaqatigiilersinneqarnissaat.

Meeqqat atuarfianni atuartitsissutit atuartitsissutillu qanitariissut tamarmik pinngitsooratik atuartitsissutigineqartussaareerput tunngaviumillu tamarmik naligiissutut isigineqartussaallutik. Meeqqat atuarfiannik 2002-mi aaqqissuusseqqinnermi akunnerit atuartitsiviusussat agguataarnissaannut najoqqutassatut ilitsersuut - atuartoqassuseq aallaavigalugu akunnernik atuartitsiviusussanik ikilisaaffiusinnaasoq - atorunnaarsinneqarpoq taarsiullugu ukiumut atuarfiusumut tamarmiusumut ukioqatigiinnut akunnernik minnerpaaffiliisarneq atorneqalerluni.

Taassuma saniatigut atuartitsissutit siunertaat, alloriarfiit siunertat ilikkagassatullu anguniagassat atuarfiit ilinniartitsisullu atuartitsinissamik pilersaarusiorminni tunngavissaattut atuutilersinneqarput. Anguniakkat taakkua atuartut atuarnerini ilikkariartornerannilu nalerarineqartussaapput, minnerunngitsumillu anguniakkat anguniarnerini ilaatigut qanoq ililluni pilersaarusiortoqassanersoq atuartitsissutinilu ataasiakkaani qanitariissunilu akunnernik qanoq amerlatigisunik atuisoqarnissamut nalilersuinermit aamma tunngavigineqartussaasunik. Taamatut eqqarsarnermit aallaaviuvoq kommunit meeqqat atuarfiannut akisussaasuunermikkut sumiiffinni pisariaqartitsinerit unammilligassallu toqqammavigalugit aaqqiissuteqartarnissaat.

Tamatuma saniatigut atuarfik pillugu inatsisip pamersaanikkut tunngavigaa atuartitsineq atuartut piginnaasaat pisariaqartitsinerallu toqqammavigalugit aaqqissuuneqartassasoq. Taamaattumik tamatumani kommunit minnerunngitsumillu atuarfiit ataasiakkaat akisussaaffigaat atuartitsinerit atuartuutimik piginnaasaat aallaavigalugit aaqqissuutissallugit

tamatumalu saniatigut ilinniartitsisut piginnaasaat ilinniarsimanerallu toqqammavigalugit pilersaarusiornissaq.

Naalackersuisut ernummatigisinnaavaat atuartitsissutit ataasiakkaat minnerpaaffilerlugit aaqqiinerup kingunerisinnaassagaa, inatsisimi anguniagassatut taakkartorneqarsimasut imaluunniit atuartut pisariaqartitaat tunngaviginagit ingerlatsisoqalersinnaanera, tamatumanilu aallaavigineqarnerulersinnaalluni akunnerit minnerpaaffissaat aallaaviginerullugit ingerlatsisoqalersinnaanera. Tamatuma saniatigut nalinginnaasumik ilisimaneqarpoq akunnerit atuartitsiviusut amerlassusaat aammalu atuartut angusaat tamatigut imminnut naapertuuttuuneq ajortut, kisiannili aalajangiisuunerusarluni atuartitsinerup pitsaassutsimigut qanoq inissisimaffeqarnera, tamannali atuartut atuarnerminni qanoq angusaqarnerannut aalajangiisuunerpaasartoq. Tamanna aamma imatut oqaatsigineqarsinnaavoq, aalajangiisuunerusartoq akunnerit atuartitsissutigineqartut imarisamikkut qanoq pitsaassuseqartuunersut, tamatumanili aalajangiisuunerpaasartoq atuartitsinerup pitsaassutsimigut qanoq qaffasitsigisimansoq.

Taamaattumik Naalackersuisut isumaqarput kommunalbestyrelsit suli taakkuusariaqartut, sinerissami atuarfinni kommuninilu perorsaanermik suliaqartunit innersuussutit tunngavigalugit – meeqqanik qanimut atassuteqarnikkut attaveqateqarnikkullu – ilikkariartortitsiniarluni sammisaqarnernik pilersaarusiortullu aaqqissuisartussat – aamma tassunga ilanngullugu piffissamik atuartitsinermut atorneqartussamik aalajangersaasartussat.

Taamatut Naalackersuisunit akissuteqarluta, inassutigissavarput siunnersuut itigartitsissutigineqassasoq.